

失題

憐嗟頻憶舊，梅月在天涯。
窗外風枝動，夢中盈落花。

月光海

海月開瑤界，金波動客愁。
廣寒清影在，安得木蘭舟？

犀照

衰世河山暗，潛形罔兩多。
燃犀辨人鬼，擗鼓奮靈戈。



少年遊

客路花光映翠微，清愁偶作夢依稀。
千紅過眼還持守，只帶香風滿袖歸。

草鞋

草木精誠感自然，登臨輕似踏雲煙。
何時披髮扶桃杖，更向林山作散仙。

戲作

萬貫腰財失坦然，雲天水月合詩緣。
祈年且向靈山拜，但借清閒不借錢。

案：農曆正月廿六日為觀音開庫日，善信可往觀音寺借庫。

壬辰歲末

三十無成強自如，來年籌略是詩書。

阮囊羞澀尋常慣，差喜癡狂尚有餘。

遊敦煌莫高窟

如如百劫隔風塵，暗室千年未識真。
無量娑婆空色相，提燈照壁認前因。

梅嶺

遙看三星怨夜時，酒香花氣襲寒衣。
雪梅應是瑤台種，不解人間有所思。

秋水齋自題

秋水來天地，無違即自如。
風雲同浩蕩，山月共蕭疏。
寄趣堪題葉，遊心但枕書。
能觀一塵闕，小齋亦仙居。

夏夜

- 吾於夏夜輒喜坦腹於宿舍天台上，默觀星空，遊心宇宙，同初民之所見，體天地之大美。

天地吾廬大，偃臥還半醒。
舒顏漸遺世，坦腹近忘形。
星氣瀾漫汗，神思入杳冥。
太虛疑蝶夢，彈指即千齡。

感時

十年回首月蒼涼，大道凝陰獨履霜。
妄想微軀寄湖海，忍看孤戍戰玄黃？

龍獅失位誰堪主？雞犬逢時盡為王。
歎慨遼陽歸鶴唳，書生按劍尚猖狂。

心

人天戰地久崢嶸，中夜頻傳鼓角聲。
龍虎交爭風雨暗，兵戈相接電光明。
罡風立浪傾滄海，地火燎原壞巖城。
塊壘三千劫灰盡，酒神長共日神生。

三十自述

十年磨劍復藏鋒，有物混成久在胸。
浪蕩千山窺皓月，隨緣萬象覓雲龍。
靈霄梅雪知難近，勢路車塵謝不從。
大道獨尋風起處，兩間誰更辨鴻蹤？

次韻吳君□□詩並勉之

詞心百煉別鯤洋，待舉鵬程萬里長。
休向花間迷夢蝶，寧於塵內覓亡羊。
風埃原不妨真意，塊磊猶堪試酒狂。
煩惱菩提同此地，溫犀慧鏡照蒼茫。

附吳君□□原玉：

《夜立維多利亞港感懷》

擎天廣廈貫汪洋，隔岸燒燈與恨長。
幾縷彩雲疑夢蝶，八荒夷世始亡羊。
才窮漫有敲壺意，酒罷渾無覆海狂。
終古繁華歌舞地，一泓寒水夜蒼茫。

再次韻吳君詩並述懷

胸懷深處即汪洋，中有鯤鯨萬尺長。
情到滄桑驚幻蝶，學因憂憤說公羊。
彈冠利祿原無意，振鐸詩書便足狂。
奮翼猶難忘故地，欲飛還斂步蒼茫。

天山吟

寂寥原是女兒心，待得周王八駿臨。
月暖花迷成密約，歌殘酒滯寄憂襟。
行雲去後空思語，青鳥歸來不嗣音。
底事千秋仍未改？雪蓮開落到如今。

National Chung Hsing University

過阿里山慈雲寺

林木隱蘭若，通幽入嵐煙。
香堂無僧眾，檀篆唯寂然。
應是寮房坐，制心勤參禪。
定中參何事，真意豈言傳。
山色雲散後，紫藤未開前。
何期一聲磬，敲落霜滿天。

夜品白梅線香

蕭瑟聆夜雨，幽玄坐寒房。
隱几漸忘俗，爐熱散暗香。
燈淡如暈月，映煙動浮光。
遊心隨煙遠，神思接大荒。
香霧籠梅雪，幻真兩無妨。
且眠霜枝下，身世付渺茫。

四贈詩

贈伊飄渺香雲紗，採之天山綺煙霞。
流曙輝兮綴星斗，掩映朝顏襯韶華。

贈伊樸雅桃木簪，鬱鬱長成在鄧林。
揚淑氣兮山靈佑，邪氛瘴疫莫相侵。

贈伊初熟梅子酒，淡酸淺甜宜素口。
既微醉兮且夢回，憶昔踏月尋梅否？

贈伊聯章錦繡詩，謝伊相慰寂寥時。
人杳杳兮勞心悄，可能日久不成思？

天山觀星並睹不明飛行物

杉老山寒坐蕭森，凌雲清氣滌素襟。
罡風吹萬凝神聽，太始窈冥有遺音。
劫後滄桑此星海，幻中浩瀚是吾心。
洪荒棋局烽煙冷，奇正列陣古猶今。
流隕飛火占分野，死生果有定命臨？
天書無字誰解得？費煞多少白頭吟。
有限究難知罔極，放顏寧舉北斗斟。
但看客槎來去疾，大惑欲問復何尋？
徒嘆銀漢廣且深。

後記：二零一二年七月三十一日晝夜，與友於天山天池畔觀星，忽見一橘紅光點
橫越中天，其芒暴亮後轉弱。其飛行之速，遠高於飛機，而軌跡又異於人

造衛星，且因無尾，又似非流星一類天體。吾友更告余曰，此光點初現時，軌跡或縱或橫，並無定向。吾等不知其為何物，謂之不明飛行物，信亦宜也。

讀《易》

天地兮玄黃，日月兮維初有光。
風雷兮相盪，山澤兮草木流芳。
攘攘兮紛變，精一兮執中之常。
致誠兮合德，濟物兮生意無央。

鷓鴣天

-康南海評小山《臨江仙》「夢後樓臺高鎖，酒醒簾幕低垂」句，謂：「純是《華嚴》境界。」吾於聖誕晚會翌日醒餘，四顧茫然，惟見窗前微塵於日光下，飄浮飛動，離合無常。忽疑昨夜之紅顏綠鬢、歌聲舞影，真耶假耶？乃感人生如夢如幻，了不可持。

幾段弦歌宴夜時，荀衣紅袖彩雲飛。漫看妙舞隨燈影，暗訴幽懷共酒杯。
情厭厭，日遲遲，醒餘細味又成癡。舊香如夢依稀在，花月鏡中事已非。

浣溪紗

- 陪友人遊黃大仙祠，求得「貴妃自縊」一簽，問前程，曰多滯不順。
余一笑置之，聊賦一詞自謔。

寥落萍身慣半饑，野狐山鬼是吾師，也知貧賤不可移。世道今來
輕逸客，名場古已競朱衣，何須仙駕絳靈辭。

浣溪紗

幾度夢回看未真，冰衣雪蕊隔煙痕，靈山霄月護馨芬。殊路人天

安忍折？紅塵漸老等閒身，瓊枝只合在氤氳。

憶秦娥·寄贈

流光遽，當年俏學凌波步。凌波步，雲衣水袖，踏歌朝暮。輕狂舞落花如雨，嫣紅又被風吹去。風吹去，芳菲舊夢，為誰留住？

御街行·中秋憶舊

鄉愁並作花前醉，冷落蟾輝裡。燭華明滅往時歡，暗換幾番人世。重燃心燄，迷離光影，塵路渾如寐。滿園紅紫知何地？明月依稀記。親朋故侶復團圓，談宴同聽歌吹。提燈四顧，相逢舊我，隔淚長相對。

蕙蘭芳引·梅雨天遐想

聽雨韶樓，正春困，惱人天氣。算草色淒迷，應是埋愁無地。濕紅冷綠，猶慊慊，似醒還睡。渺靄嵐起處，隱約吳湘雲水。寄夢幽林，紫蘭煙樹，碧眉山鬼。借遐想千般，慰我酒前客裡。霞章錦筆，楚吟密意。共雨聲，聊賦此番情味。

沁園春·天山

絕域窮途，拔地穿雲，縹緲天峰。看草肥馬俊，花明幽壑；崖高鷹疾，雪映奇虹。碧鏡涵虛，微波動影，飛瀑奔雷掛玉龍。情深處，誰仙妝理罷，倚待瑤宮？藩屏西北蒼穹，歷生死茫茫始鑿空。念玄奘萬里，傳經佛法；長春一語，止暴元戎。胡漢恩仇，千秋血淚，且挽星河洗劍鋒。天山月，願戰塵吹遠，浩蕩光風。